

四庫全書

史部

欽定四庫全書

史部

續資治通鑑長編卷二百四十八

詳校官檢討

臣劉錫五

刑部郎中

臣

許兆椿覆勘

纂修官編修

臣

劉

湄

謄錄監生

臣

周謨揚

欽定四庫全書

續資治通鑑長編卷二百四十七

宋 李燾 撰

神宗

熙寧六年九月辛丑朔判司農寺曾布權御史中丞鄧綰權知審刑院崔台符並無詳定一州一縣一司一務敕詔自今巡教使臣校殿最雖以十分為率其第一等事藝及八分或射親不及三分雖入最不行賞提

舉詳定編敕宰臣王安石等言新修編敕雖已經審刑
刑部大理寺殿前馬步軍司等看詳尚慮事理未盡欲
更送中書樞密院再詳看籤貼及付在京刑法司律學
官吏等各具所見申中書送提舉詳定官看詳如當改
正即改正刊印頒行從之 上批賜河州沿邊安撫司

錦綵令招撫蕃部

五月四日初置
洮西安撫司

王安石白上宜專委

王韶先是上論景思立王韶事上以為王韶作緣邊安
撫司事體與景思立不同至是安石為上言陛下前用

王韶為沿邊安撫司以羌事成敗專責王韶當是時若
陛下即用王韶為經略使則洮河事成疾二三年惟其
用王韶為沿邊安撫別置帥此韓縝所以出違異之言
郭達所以起矯誣之獄也今沿邊安撫司非專任洮河
成敗者與王韶事不類即每事當令聽王韶不如此軍
政不一上下更生釁隙害國家邊事上曰武臣自來安
敢與帥臣抗安石曰先朝以來任帥臣如此非失計但
置帥臣非其人乃是失計馮京曰孟德基止因經朝廷

言利便不由王素王素移令監教閱幾欲自殺安石曰
若置帥即部內利便人爭自言何至乃令經朝廷自獻
只緣置帥不善故有此又為上言邊事得失在幾微之
中不可不察如房琯賀蘭進明事乃致睢陽不守其本
甚微其末甚大安石自叙云蔡挺方主景思立害王韶
故以此警上

孟德基當考王素
作帥時任何官

安石又因論鹽事言兩

浙近立廂軍額少不便乃至令衙前自雇人送綱上曰
祖宗時廂軍數少安石曰帳籍既不可知又祖宗時事

不同上曰祖宗時官少故占廂軍少安石曰亦恐不止
為此臣耳目所接尚見圓融門內戶夫修造及送綱多
令鄉戶衙前自雇夫脚諸夫力縻費出於民力而不出
於兵力者甚衆自韓琦富弼執政以來即稍禁止此事
非但近歲差役法以來禁止也恐如此之類亦是占使
兵士多供役不足然此事實可愛惜得民力若以公私
為一體即稍費廂界不為害也

士寅知熙州王韶言河州平有隨軍百姓三十餘人殺

降人略財物已斬之詔韶密推究殺降兵級及降人被
略殺傷數并詳度部押使臣人員合與不合勘劾仍命
內臣梁從政密體量以聞

朱本削去新本同
朱本今復存之

先是王韶

亦以書抵王安石言殺降事安石白上部轄使臣將校
宜按劾不如是無以明紀律後難復用上難之安石又
論其當治之狀乃有是命上既難治殺降事又問王韶
所言或指涇原人安石曰韶奏狀并熙秦亦有上乃怪
韶不當遽受其降以為殺傷涇原人衆矣而遽受降故

士卒發憤安石曰若不受降即城未必遽下上曰秦云掘城城欲透安石曰城中尚有二千人必不肯生死即殺傷又非特二千人而已今受降極善豈可復以為非耶荆湖北路轉運司言辰州南江將官楊萬等與蠻鬪敵有功詔楊萬夏方遷兩資餘遷資減磨勘年賜絹有差相度兩浙路水利沈括言浙人以治田為生所入甚廣急於得錢賤糶於有力人家迨春夏闕食又從有力之家貴糶今欲立斂散法且於一二州置和糶倉

候其成緒以漸推行庶不至傷農從之 管勾廊延路
經略司趙禹言自今遇大閱漢蕃陣隊且以萬二千五
百人為法旌旗徽幟各隨方色先鋒策先鋒為一色左
翼一左翼二為一色右翼一右翼二為一色殿後策殿
後為一色內中軍所建六纛五方旗外餘亦為一色戰
國之時大將之旗以龜為飾蓋取前列先知之義今中
軍亦宜以龜為號其八隊旗則繪天地風雲龍虎鳥蛇
天地則狀其方圓風雲則狀其飛揚龍虎則狀其猛厲

鳥蛇則狀其翔盤之勢以備大閱而樞密院以為陣隊旗號若繪人物慮士衆難辨而其間亦有無形可繪者遂詔大閱旗幟止依方色仍異其形制令勿雜而已

癸卯以前權江陰軍判官邵奇為太子中允知秀州華亭縣奇召對稱旨詔遷合入官與差知兩浙有水利縣王安石薦之也安石初言奇有才略欲令赴熙河準備差遣至是乃言恐奇不肯為朝廷振舉法令姑嘗試之乃命以此賜虞部郎中趙至忠絹三百至忠本契丹

歸明數言契丹舊事故有是詔

至忠初見慶厯元年又嘉祐二年熙寧二年

上批付樞密院勘會河北河東陝西江淮京東西湖廣
福建川峽等路見在都副總管鈐轄都監并三路緣邊
都同巡檢職位姓名及到任再任年月日作揭貼冊進
入

乙巳詔趙高詳度權移一將兵及河東秋戍馬軍七指
揮就內郡糧草以廊延年穀不登並邊艱食故也於是
王安石又言趙高欲支弓箭手糧草誠非計上曰高但

為弓箭手必無他意楊蟠姦險小人安石曰陛下付蟠
以一路若蟠姦險有狀宜劾正其罪豈可但已上又曰
蟠踰違考素行必不如趙高安石曰楊蟠踰違脚色已
經進呈非中書蔽覆然少年踰違自大臣以下皆所不
免便以此一事斷其君子小人以為忠信不如趙高竊
恐未可今陛下所尊禮之人恐亦未免少年有踰違之
行若謂其姦險小人即臣未見其狀乞陛下以所知事
狀付臣等推究施行上又言高所擘劃甚善安石曰陛

下既以為善何故不行臣既備位宰相不敢不布所懷
若陛下不以臣言為可何必用臣言決事上又欲令借
方箭手以草料安石曰今諸路已行借助法何須別借
上曰借助法但支錢米無草料安石曰借與錢豈不能
自買糴上曰無可糴買故也安石曰若私下散行糴買
尚患其無即廊延見草不支數月卒然兵馬食盡如何
令轉運司買糴此臣所以不敢不言若陛下要支與有
何不可何必黽勉從臣所言也

八月二十
六日可考

丙午詔諸軍校雖已老而諳部轄者當優假之自今體
量簡選雖小有疾而精神未退兩目見十五步手足不
妨武藝能上下馬年未七十堪部轄差使者姑與存留
即雖該退簡而不知部轄者隨處以聞當議改充廂軍
將校 辰州南江歸明溪峒硤州軍衙頭首指揮使向
真贈內殿崇班以章惇言真說論蠻人有勞後為蠻舒
光旦等驅略并屠其家故也

丁未翰林學士右正言曾布為起居舍人工部郎中龍

圖閣待制鄧綰為兵部郎中權知審刑院崔台符權發遣大理寺少卿朱溫其等九人升任遷官循資有差並以修編敕成故也賜提舉王安石銀絹各五百降詔獎

諭會要熙寧六年八月七日提舉編敕宰臣王安石上刪定編敕赦書德音附令敕申明敕目錄共二十六卷詔編敕所鑄版自七年正月一日頒行先是詔以嘉祐四年已後續降宣敕刪定命大理寺直官劉賡左班殿直張杓充檢詳官刑房堂後官劉袞充點對官秘書丞胡瑗太子中舍陳慤大理寺丞張巨光祿寺丞虞太寧充刪定官權大理少卿朱溫其充編排官翰林學士曾布龍圖閣待制鄧綰權知審刑院崔台符充詳定官安石提舉至是上之

戊申入內都知張若水提點內弓箭南庫張茂則都大
提點內弓箭軍器等四庫上批內弓箭南庫係新創置
貯內降御前物色其軍器監及提點內弓箭器等庫並
不得統轄

七月十三日

淮南東路轉運司言真揚州民逐

熟於泗州見賑救及兩浙提點刑獄司言潤州旱甚乞
發省倉或量給度僧牒及紫衣師號救募人入粟以備
賑濟詔各撥常平司糧三萬石募飢民興修農田水利

二十一
日又詔

辛亥御崇政殿試武舉進士

八月二十一日閏
試十七日推恩

凡武舉

初試義策於祕閣武藝則試於殿前司及殿試則又試

策於廷於是詔武舉人策入優等武藝又入優等與右

班殿直武藝次優與三班奉職末等與三班差使減磨

勘二年策入平等武藝優等與奉職武藝次優與借職

次等與三班差使減磨勘二年末等三班差使 贈慶

州柔遠寨蕃官西京左藏庫使趙餘慶成州團練使大

順城蕃官文思使趙餘德果州團練使賜其母巢氏冠

帔巢夫明有武力為夏人所畏而餘慶兄弟屢有戰功
繼死會詔諸路各遣有功蕃官赴闕巢對使者泣以被
召者多其夫子部曲感二子之不得見至尊獨有畫像
願與使者俱達朝廷雖死不朽上憐其意故有是命

癸丑以鹽井川所築城為鹽川寨隸通遠軍

按六月二十三日高

遵裕已於鹽井川築城寨此但賜名耳
實錄云置鹽川寨殊不詳今略刪潤之

御史丁執禮

言度支郎中皮公弼昨任發運使奏開黃池江計夫六
十萬實用七十萬益以運兵三千仍令丁夫夜作逃死

者千餘人乞重降貶詔淮東轉運提點刑獄司體究
是日輔臣奏事已上顧王安石曰聞鄉子雱久被病比
稍愈否安石曰雱病足瘍下漏徧用京師醫不效近呼
泰州瘍醫徐新者治之少愈上曰鄉子文學過人昨夕
嘗夢與朕言久之今得稍安良慰朕懷也

甲寅莊宅使帶御器械知鎮戎軍張璠為右騏驎使提
點鳳翔府太平宮璠有戰功以病請退故也

張璠已見
二年六月

丙辰引進使眉州防禦使李端慤言朔望御文德殿祁

寒盛暑數煩清蹕紫宸之朝歲中罕御欲乞朔日御文
德望日御紫宸所貴正衙內殿之朝儀並舉從之 賜

也田員外郎侯叔獻太常丞楊汲府界淤田各十頃叔

獻等引河水淤田決清水於畿縣澶州間壞民田廬塚

墓歲被其患他州縣淤田類如此而朝廷不知也

此墨史所

書朱史簽貼云取問到前史官並無照據即無田廬墳

塚歲被其患之事顯是前史官誣罔合行刪去添入王

安石日錄內語按朱史所刪去新史已復存之日錄內
語仍載於四年五月十一日林希野史云原武等縣民
因淤田浸壞廬舍墳墓又妨秋種相率詣闕訴使者聞
之急責其令追呼將杖之民即謬云詣闕謝爾使者因

代為百姓謝淤田表遣吏詣鼓院投之狀有二百餘名
但二吏來投之爾安石大喜上亦不知其妄也希不記
何年今附注此又
附七年正月甲子

丁巳賜武舉進士文煥及第注兩使職官熙河路準備

差遣侯抱真而下二十三人授以三班奉職借職差使

緣邊差遣後復賜煥進士及第為梓夔路察訪司準備

差遣

據日錄文煥黔州武進
士當考十一日御試

戊午王韶言大首領轄烏察等以岷州來獻賜行營將
士特支錢有差轄烏察者摩正諸弟也居岷州雖有部

族無文法今年春寇臨江洮山寨至是乃降

朱墨二本十一月八

日丁未又書轄烏察來降
與此相重今移彼附此

辛酉命宰臣王安石為奉安太一使樞密使陳升之參
知政事馮京王珪樞密副使吳充蔡挺為前導官龍圖
閣直學士孫固管勾鹵簿儀仗入內都知張茂則都大
管勾初進呈奉安故事當差宰臣上欲止差參知政事
以為郊始用宰臣為使王安石曰太一即天帝上乃差
宰臣前專用御容例即差兩府上令差兩制安石言恐

合依御容例上曰天神也仍差兩府前導環慶路蕃

官內殿崇班蒙布為內殿承制閣門祗候蒙布累有戰

功故引見而命之詔三司委官比校淮南等七路酒

稅課利增虧以聞淮南等路發運使羅拯言兩浙淮

南東路災傷民多流移恐向寒益致飢殍乞行貸卹詔

增賜兩路常平糧斛各三萬石並依戊申詔旨施行內

兩浙仍令沈括提舉

戊申
八日

壬戌御史蔡確言聞京東河北路提舉鹽稅王伯瑜於

所部商販逐利奏事赴闕及出巡至近畿販京東河北
帛入京師復以京師帛賈瀆棣間往往與本部公人秤
子交市家有數機更自織造伯瑜人物至下幸蒙任使
以案察為職而身不奉法貪恣之聲流於道路乞遣官
窮究其事重行絀責以戒搢紳詔京東河北轉運提點
刑獄司體量以聞其後逐司言伯瑜在職審有不公事
狀詔送京西北路差官劾之伯瑜坐追四官勒停唐州
安置又言孫坦自河東轉運使除度支副使物論不以

為允但奉使諸路最為無狀前後刺舉乖實上賴朝廷
清明不容坦之誣罔官吏每皆得脫冤濫坦之不公暗
繆中外莫不詳知忽蒙召還參掌大計不惟坦之冒竊
將誤任使而天下職司無以勸沮乞置之散地以協衆
望不報

據朱史發貼云無施行刪
去今依舊存之但云不報

王韶入岷州轄烏

察及本琳沁來降韶諭以不討虜無所得食兩人各獻
大麥萬石牛五百頭羊二千口并甲五十領於是王安
石請償其價上疑此犒軍物不須償安石曰攻而取之

服而有之既有之則不宜徒受其獻償其價乃所以懷

慰新附也上從之

九月二十日

癸亥樞密院言諸司副使兼閤門通事舍人及十年遷
閤門副使并中等使額本條雖言經遷任及朝廷委寄
顯著勞能者方遷即不定遷任職局所在亦不分勞能
大小等差及以何使額為中等故王咸有得以滑州鈐
轄為寄任王易王澤李瑊皆自宮苑副使轉南作坊使
十五資使額為中等良以立法之初不至詳備欲自今

諸司副使兼閤門通事舍人如充職及十年曾歷四路沿邊路分都監或緣邊知州軍或安撫都監副使同安撫或自轉大使臣後以勞績曾遷官者皇城宮苑副使並除閤門副使雖不歷緣邊又無勞績但及十二年者亦遷閤門使副其餘副使並據使額遷五資依舊兼職若不願兼職及遷正使者並罷兼通事舍人其舊條曾經邊任及朝廷委寄顯著勞能兼轉中等使額自今更不行用從之

王咸有事日錄因程昉轉官略見其端當考

詔故長寧州土

刺史糾蓋子糾辣為長寧州土刺史隴厲村首領糾始
該為巡遏使以措置夷事熊本言糾辣族距消井監十
里領山前十二村夷衆未嘗為寇昨以一馬七牛吉刀
等結糾始該攻討三里夷賊來効首級糾辣乞與父時
封爵隴厲村亦控制諸夷水陸形勢之地緣始該隸南
廣州土刺史李行從難即使之同列故有是命

戊戌手詔聞河北近置獄甚多捕繫亦衆無辜吏民頗
苦追擾可令監司提舉司速具見置獄所勘罪狀及禁

繫官吏以聞仍先催促結絕無令枝蔓 分命輔臣祈

雨 察訪梓夔路常平等事熊本言近制漢戶典買夷

人田土者聽今訪聞戎瀘州縣分前此漢人亦多私典

買夷人田土者皆出情願即無競爭但不敢經官印契

謂宜許令齎契赴官陳首如無交加即印契給還其元

無稅租地土不以敕前後並令量認租稅從之

五年九月三日

詔陝西緣邊蕃部土地許典賣租賃今年五月二十九日又聽典買夷人田土

判將作監向

宗儒乞罷蔡河水岸從之初議者乞置木岸已而計功

所用梢樁夫力頗大故罷之止令修完土岸而已

是月廢真定府井陘河中府永樂濱州招安相州永和

祁州深澤冀州新河陳州南頓縣並為鎮

據九域志省鄴縣當附此

年實錄本紀並係五年五月當考

上謂王安石曰奉先寺進新種稻極

佳賜與一道紫衣王安石曰陛下每以勸農事為急甚

善初蔡河既作重閘有餘水乃教河側人種旱地為稻

而奉先率先種稻上曰蔡河雖作重閘而未嘗閉者水

有餘故也若教人廣引蔡水種稻則蔡河乃不患水多

安石曰鄧艾得并水東下營田者以不賴蔡河漕運故也自來賴蔡河漕運故欲并水東下作鄧艾遺跡不可得今蔡河作重閘無所用水則欲并水東下無所不可若相旱地為塘多引溝洫作水田則陳頴數州自足食餘及京師矣此須擇一能幹事人方了此

陳瓘論曰以農事為急又

急於勸農神考聖政不掩也然臣考日錄之內抵牾誣訕之言臣不能無疑焉造神考之言曰只是修水利又

不似王繼恩平得西川又撰安石之對曰民功曰庸乃

先王之所甚貴何必平西川也嗚呼是則掠美於己非

則斂怨於君呂誨之言可謂不誣矣只是修水利又不似王繼恩平得西川見七年二月九日

冬十月庚午朔提舉在京市易務言市易上界先借內藏庫本錢百萬緡乞三年還從之仍以今年當撥錢三十萬緡借為杭州市易務本軍器監言遣著作佐郎

朱伯虎等齎精利軍器付逐州軍為式製造從之

六月二十

七日
可考

知貴州沈起言招到融州溪峒蠻人乞籍為王

民開通道路建置州縣城寨詔具當補首領職位及所

經制事以聞

十二月十三日可并此

又詔知熙州王韶籍殺傷

河州降人者以名聞如委難推究即勘會王君萬等捕

卷一百四十七
斬人元管使臣及同作過人條具來上初圍河州蕃部
開門請降諸軍既入夜殺降者二千餘人軍前匿之不
奏上聞之曰禍莫大於殺已降故命考實其後韶究殺
傷已降蕃部等數詔景思立不賞趙簡等十三人候韶
到闕取旨 熙河路經略司言乞許人投換義勇以地
給之起立稅額詔以官地招弓箭手仍許近裏百姓彊
勇者占射依內地起稅排保甲即義勇願投充及民戶
願受蕃部地者聽之其頃畝令經略司以肥瘠定數本
志

同

辛未江淮等路發運使太常少卿羅拯為左司郎中天
章閣待制留再任 改提舉在京市易務為都提舉市
易司應諸州市易務隸焉 荆湖南路察訪章惇言三
路進兵討懿洽州蠻已平

綱要云斬蠻酋田元猛

司農寺奏請

白馬韋城胙城管城新鄭五縣保甲依畿縣例於巡檢
縣尉司上番教閱從之 光州刺史駙馬都尉張敦禮
乞立春秋學官不許先是上以敦禮不識王安石遣敦

禮詣中書見之敦禮求獨見安石安石辭以不曾被旨
與衆見之是日上問安石見敦禮否安石對如前上曰
卿嘗以春秋自魯史亡其義不可考故未置學官敦禮
好學不倦於家亦孝友第未知此意耳敦禮但讀春秋
而不讀傳春秋未易可通馮京等曰漢儒初治公羊後
乃治穀梁左氏最後出上曰漢儒亦少有識見者

壬申權三司使薛向言準詔根究陝西財用闕乏因依
乞遣度支判官鄭民憲乘驛點磨秦鳳等路其永興軍

路就委提點刑獄張穆之從之

十一月一日罷省牒取索文字

王安

石言近得章惇書辰州屢獲首級新附之民爭先思奮
蓋恐功在人後上曰近者諸路士氣甚振凡兵以氣為
主惟在朝廷養之耳馮京曰陛下賞之厚上曰慶厯日
用兵賞非不厚然兵勢沮敗不能復振此可為鑒也安
石曰誠如聖旨若令數敗即雖厚賞之何能振其氣要
當制置令勿敗耳上以為然因言李牧事曰古人役不
再籍糧不三載蓋養士氣以一決成功安石曰此所謂

其節短也一鼓作氣再而衰三而竭亦是意也 詔河

州安鄉城黃河渡口置浮梁築堡於河之北上曰安鄉
城鄣廓通道也濱河戎人嘗剽木以濟行者艱滯既甚
何以來遠故命景思立營之又詔延州永寧關黃河渡
口亦置浮梁永寧關與石隰州跨河相對嘗以芻糧資
延州東路城寨而津渡阻隔有十數日不克濟者故又
命趙高營置以通糧道兵民便之 是日王安石因進
呈瀘州事言得熊本書以為甫望箇怨晏子可羈縻初

本在京師臣與言當如此本不以為然及今乃知須合
以爵命羈縻緣甫望箇恕羈旅能畧有生夷自立必粗
有才畧或是豪傑若不羈縻任其并吞以彼生夷不難
并制遂致強大即為一方邊患今乘其未然以爵命羈
縻旁近諸夷各隨所部加以爵命既各有爵命並為內
屬部落即難相并吞縱欲如此即諸部各待王命彼亦
畏中國討伐又懷恩命自然并吞之心息此所謂為大
於細圖難於易也上悅曰已令熊本經制他日可如此

安石曰本云且有奏請僉議除瀘守上曰專令熊本經制却令本自舉一人知州事更求人必未及本安石曰此甚善

癸酉詔諸軍排聯長行遷節級應取功勞者取兩次以上人功勞等以先後先後等比重輕重輕等以金瘡多者為先

甲戌相度兩浙路水利事沈括言常潤二州歲旱民飢欲令本路計合修水利錢糧募闕食人興工從之併

龍衛三十九指揮為二十指揮

乙亥詔淮南東西兩浙路災傷州軍當職官有弛惰不職不能存恤振救飢民者選官對移仍體量事狀以聞知桂州沈起言邕州左右江溪洞前此職司未嘗巡歷今轉運判官杜璞獨往慮諸蠻以故驚疑詔璞依故例出巡其入洞點檢教閱兵甲即令經畧司差官

丁丑秦鳳路經略司言發弓箭手彊人二千駐岷州詔於水洛城及於永興軍屯兵內差人代歸本路上以邊

人調發頻數慮民力不堪故寬之也 詔布衣李復王

諶聽往川峽募人分耕畿縣荒地以為稻田

元豐元年十月乙卯

復諶推賞所募耕者闕人亦任焉不但川峽也

戊寅三班奉職申翊為右班殿直閣門祇候武學教授
初三班使臣入仕年已及格當調官者雖有法式尤草
畧至是命立新格程其能否而進退之翊弓馬策問皆
入高等特擢之 又詔熙州大威德河州德廣禪院歲
各賜錢五十萬設道場為漢蕃陣亡人營福 王韶奏

收復岷洮等州乞優賜諸軍特支錢從之

庚辰分命輔臣祈雪 秦鳳路都轉運使天章閣待制

蔡延慶為龍圖閣直學士

本傳云云已附注十一月二十五日

詔三司

出紬絹二十萬付王韶買熙河路蕃部餘田 又詔岷

州置廣銳武衛本城廂軍各一指揮 熙河路走馬承

受人內東頭供奉官李元凱為六宅副使寄資元凱以

經略司提奏詣闕故也初王韶既城河州獨將兵至馬

練川降轄烏察進攻宕州拔之通洮山路岷州本琳沁

以城降遂入岷州分兵破青龍族於綽羅川通熙州路

疊州策凌扎卜洮州卦斯敦皆相繼詣軍中以城聽命巴

珍覺亦以其族自歸軍行凡五十有四日涉千八百里

復州五關地自臨江寨至安鄉城東西千里斬首三千

餘級獲牛羊馬以數萬計

呂惠卿墓誌云於是西直黃河南通巴蜀北接舉蘭幅員

踰三千里當考惠卿誌

韶墓國史多因之惠卿又云降其名王二蓋轄烏峒及巴珍覺皆王也史既削去今亦

從之王韶收復五州皆無端的

月日據日錄八月二十

六日韶奏洮州降九月十七日奏至馬練川十八日奏

轄烏峒等獻岷州其他皆無是役也人皆傳韶已全師

所考見今依本傳并書于此

覆沒及奏捷上乃大喜蓋洮岷疊宕連青唐瑪爾巴山林木翳蒼交道阨阻不可行韶欲為兵除道乃先遣人以伐木為名令青唐羌為衛以大兵駐谷口鎮之至是可連數騎以行而鹽井平川初既築城又據青唐咽喉之地王安石謂韶謀中機會故所至克捷云

辛巳宰臣王安石等以修復熙州洮岷疊宕等州幅員二千餘里斬獲不順蕃部萬九千餘人招撫大小蕃族三十餘萬帳各已降附上表稱賀上解所服玉帶賜安

石遣內侍李舜舉諭旨曰洮河之舉小大並疑惟卿啟
迪迄有成功今解朕所御帶賜卿以旌卿功安石再拜
固辭曰陛下拔王韶於疎遠之中恢復一方臣與二三
執政奉承聖旨而已不敢獨當此賜上又令舜舉諭旨
曰羣疑方作朕亦欲中止非卿助朕此功不成賜卿帶
以傳遺子孫表朕與卿君臣一時相遇之美也安石受
賜常日御垂拱殿是日以受賀故再御紫宸 知熙州
樞密直學士禮部郎中王韶為端明殿學士兼龍圖閣

學士左諫議大夫秦鳳路副都總管捧日天武四廂都
指揮使昭州刺史張玉為宣州觀察使知通遠軍權熙
河路總管西上閤門使榮州刺史高遵裕為岷州刺史
知岷州引進副使張守約知通遠軍 初議賞王韶以
節鉞王安石曰優與轉官職可也節鉞宜待後功韶奏
乞與黃察換武官令知岷州上曰岷州當付高遵裕用
察非所宜王安石曰誠當如此乃使守約代遵裕上又
欲令遵裕帶沿邊安撫使曰王韶嫌景思立事權重若

復以此命遵裕則足以抗思立事權安石曰甚善翌日又言陛下欲經略四夷則須明軍中紀律太祖遣兵伐江南諭曹彬但能斬次將即能為大將蓋知長子帥師弟子與尸之義故也今王韶為大帥高遵裕則陵慢於東景思立則陵慢於西昨與思立分路乃令思立自擇要去處其後約與思立會合思立乃不肯來即止令苗授以下來不得已而來然亦不至所期處而止臣聞如此問之李元凱果然若將佐乖戾不相承稟如此則大

將威名不立於境內如何欲加敵國今韶幸有功臣謂
陛下宜稍別異令高遵裕景思立輩知所忌憚則韶威
名宣著邊境大將威名宣著即勝之半也如其不然恐
緩急有大舉動必誤事耳 是日上論及天下戶口之
數王安石等奏戶口之盛無如今日本朝太平百年生
民未嘗見兵革昨章惇排定湖南保甲究見戶口之衆
數倍前日益天下舉皆類此上曰累聖以來咸以愛民
為心既未嘗有大征役又無離宮別館繕營之事生齒

蕃息蓋不足怪因言三代盛時諸侯一遵法度及其衰
法制弛壞不可復振為天下者正當以大公之心以正
朝廷使紀綱號令上下有守雖更數千百年安有怠忽
之弊又論邊將因言李廣程不識之為將謂廣得士心
不識有節制已能勝敵之半 勾當御樂院李憲為遙
郡團練使寄資給全俸景思立攻下阿納城憲監其軍
故有是命

壬午賜岷州公使錢歲千五百緡

癸未內藏庫使提舉熙河路蕃部王君萬為皇城使英
州刺史賜絹五百匹走馬承受六宅使李元凱為禮賓
使寄資大理寺丞汲逢遷兩官餘推恩有差賞收河州
之功也 詔三班使臣先給事英宗者並與指射差遣
一次

甲申朝獻景靈宮

丙戌遣司門員外郎趙約之自京至河州提舉編排馬
遞鋪及補帖兵級季一替仍令河北監牧司給馬配填

以上批聞秦州以西至河州遞鋪關兵士及馬故也

募在京廂軍赴河州人支錢千賜袍一 秦鳳路轉運

使蔡延慶言比差三班奉職伊懷寶管押糧草出洮西而懷寶以前日部糧草得賞輕乃求隨軍如奏功望毋推恩以誠徵倖上曰此亦人之常情管押糧草何人不可懷寶亦勇士正堪行陣蓋延慶使之非當耳又曰岷河蕃部族帳甚多儻撫御咸得其用可以坐制西夏政所謂以蠻夷攻蠻夷若於陝西極邊會合閱練為用兵

之勢以形敵人彼必隨而點集以應我頻年如此自致
困敝兵法所謂佚能勞之者也王安石曰朝廷但當先
為不可勝聚糧積財選兵而已新附之羌厚以爵賞收
其豪傑賜之堅甲以激其氣使人人皆有趨赴之志待
我體完力充鼓行而西將無不可馮京王珪曰儻如聖
策多方以誤之彼既疲於點集而我無攻取之實一二
年間必不我應自爾舉兵若蹈無人境矣上曰此乃昔
人取吳之策也夫欲經營四夷宜無先於此 賜兩浙

淮南東路常平米各五萬石付轉運司以賑飢民

丁亥熙河路經略司言邈川蕃部都巡檢使溫納木扎爾頽
沁薩勒乞授官給俸詔授莊宅副使依漢官請給時溫納木
扎爾頽沁薩勒居河州之北所管二十八部族有兵六萬餘
人西接董戩南距黃河勺家族東界咱家族北鄰夏國
所居至河州四驛今與夏國通和聞河州既下遣次首
領和爾阿木都四十三人請命故寵之上批步軍司虎
翼右第二軍第三指揮人員三百四十六人引見呈試

弩槍刀轉資賜銀有差巡教使臣以下皆推恩時在京

諸軍出戍還營教閱多廢忘上初置內教場訓練有法

旬一御便殿程其能否而勸沮之人人奮勵

五年九月癸亥舊紀

書始御便殿旬校諸軍武技而勸沮之新紀同蓋誤也合削彼存此

皇城使馬偁言河

北禁軍自立牙教陣法訓練已成序惟馳驟野戰未精

臣竊見涇原路土兵最號精銳乞選弓馬出衆之人赴

河北教習從之手詔河北災傷其境內盜賊委安撫

司酌情處斷今淮南歲飢可檢會依此指揮詔常州

武進晉陵湖州歸安烏程長興五縣各增丞一員杭州
鹽官於潛湖州德清武康秀州崇德五縣各增主簿一
員以事劇從轉運司請也

庚寅兩浙轉運鹽事司乞益兵千人詔發開封府界京
東兵各五百人時以鹽法未行盜販者衆故也

熙寧四
食貨志

年分遣大理寺丞盧秉著作佐郎曾默往淮南兩浙詢
究利害異時竈戶煮鹽與為市鹽場不時償其直竈戶
益困秉先請儲發運司錢及雜錢百萬緡以待買鹽者
而鹽場皆定鹽竈火仗盤數以絕私煮之弊自三竈至
十竈為一田而煮鹽地什伍其民以相稽察及募酒坊
戶願占課額取鹽於官賣之月以錢輸官毋得越所酤

地而又嚴捕盜販者於是兩浙鹽事司請益兵千人詔
發開封府界京東兵各五百人王安石為上言曰兩浙
自去歲及今歲各半年間所增鹽課四十萬今又增及
二十五萬緡而本路欲用四萬募兵增置巡檢甚便樞
密院蔡挺以為不可皮公弼馮鼎者希望沮其事安石
曰夫以所增鹽課十分之一二足以多招廂軍使私煎
者絕則無復犯刑其利一也沿海之地有戍守之兵可
以待不虞其利二也鹽課大增其利三也且又不販鹽
自須反本尤為大利今杭蘇鹽課虧乃私販不禁故有
鹽賊淮南鹽課增以私販者絕故無盜朝廷若謂鹽禁
當弛曷不盡弛之若其未可即當禁絕私販然後人不
陷於刑殺今議者知鹽禁不可弛而但欲寬其禁是陷
人於刑殺也於是卒如兩浙奏蔡挺以五年二月十六
日自渭州召入為樞副不應四年便與王安石異論本
志稱四年必誤合從實錄係之六年十月二十一日今
但附注于此盧秉五年二月十八日以檢正吏房殿中

丞權發遣兩浙憲仍專提舉鹽事七年五月改淮東憲
六月仍以浙憲轉一官八年五月以太常博士遷祠外
升一任浙鹽
增課故也
上曰裁併軍營凡省軍員四千餘人此十

萬軍之資也若訓練既精人得其用不惟勝敵無亦省
財王安石等曰累歲以來陛下選用使臣專令訓練間
御便殿躬親試閱賞罰既明士卒知勸觀其技藝之精
一人可敵數夫此實國家安危所繫也安石又言併營
練卒事既有効凡此皆無害於人而不逞者乃妄相扇
動上曰須漸定去安石曰今已帖息矣

兵志第五卷併
營篇熙寧二年

始併廢營陝西馬步軍營三百二十七併為二百七十
馬軍額以三百人步軍以四百人其後總兵之撥併者
馬步軍五百四十五營併為三百五十五而京師之兵
類皆撥併畿甸諸路及廂軍皆會總奇零各定以常額
凡併營先為繕新其居室給遷徙費軍校溢員者以補
他軍之闕或隨所併兵入逐指揮依職次高下同領上
嘗謂輔臣曰天下財用朝廷稍加意則所省不可勝計
迺者銷併軍營計減軍校十將以下三千餘除二節賜
予及僕從廩給外計一歲所省為錢四十五萬緡米四
十萬石紬絹二十萬匹布三萬端馬藁二百萬束庶事
若此邦財其可勝用哉志所載上謂
輔臣云云別見七年六月十九日

章惇與王安石書

言誅舒光貴得馬軍力安石為上言之上亦以為南方
宜用馬軍安石曰彼止有步人我兼馬步固宜勝上曰

今馬軍多不精一營或止有數十匹馬安石曰此自當
省併上曰見已省併安石曰洮河異時可以牧馬若團
結訓練鼓舞蕃部為用即不患無精騎可使因言王韶
已令汲逢團結蕃部支散常平及養馬上曰須武人乃
可任此安石曰要用兵須武人平時團結即須文吏今
因散常平團結成什伍就令酋長管轄使沾息錢之利
即酋長樂為用緩急擇其材勇者以功受賞則衆必爭
奮矣

辛卯河南監牧使司封郎中劉航權河北西路轉運使
河北路都轉運使祠部員外郎史館修撰劉瑾為河北
東路轉運使 賜三司勾當公事李杞緋章服以被命
提舉陝西錢帛之勞也 鄧州置教閱忠果兩指揮請

受賞給視京東忠果 王韶言摩正子烏丹烏沁與補

一官詔補三班奉職賜姓錢名懷義 又詔河州置武

衛安鄉城置蕃落各一指揮仍差廊延環慶秦鳳路走
馬承受各就本路選舉上曰洮岷蕃族繁盛俟召王韶

至今議團結庶它日可用王安石曰羌夷之性雖不可猝化若撫勸得術其用之也猶可勝中國之人上曰昔商之頑民本居中國又以畢公主之尚書既歷三紀世

變風移況蕃夷乎但日漸月摩庶幾有就耳

日錄二十一日對語

與此相類又重疊六月四日所書今止用墨史舊文亦改宋史六月四日所書但存日錄對語緣朱史參取別修語意又重疊也

刑部侍郎致仕鮮賓王卒

壬辰權發遣廣東轉運判官許彥先請應銅錢路通行折二錢詔除在京并開封府界外諸路并通行

四年三月十四

日七年七月十八日可考
兩紀並書壬辰行折二錢

明州言高麗入貢上批本

州遣諳識海道人接引轉運司委官用新式迎勞高麗
自國初皆由登州來朝近歲常取道明州蓋遠於遼故
也上慮州縣供頓無前比因以擾民故命立式仍一切
取給于官又詔高麗不通華言慮規利之人私與交易
令所在密止約又詔引伴禮賓副使王謹初等與知明
州李縉訪進奉入貢三節人中有無燕人以聞 詔宗
室女僕嘗生子者不得再佳入有服屬位

甲午上謂輔臣曰梁從政自河州至言黃河水極清泚
不與中國比前書所謂黃河之源淺可涉蓋不誣也然
河之本源未見所出禹貢但言導河積石至於龍門不
言導河自積石以此知出積石者特其下流耳王安石
曰按西域傳河有两源合注蒲昌海其水停居冬夏不
增皆以潛行地中南出積石為中國河陛下所考禹貢
導河不言所自非臣等所及 詔五岳四瀆所在長吏
祈雪 賜章武軍留後承選芳林園宅地一區官為營

造 賜涇原秦鳳路經略使張詵王廣淵各銀絹五百
以收復河岷應副軍須有勞故也 上批武成王廟自
乾德二年用唐故事建於都南以郭子儀升殿復以李
晟補其闕詳開元十九年敕廟之始李靖李勣已與圖
象昨以堂廡頽廢命官修完今已工畢其令禮官議先
朝功臣勲烈著於簡策可配祀典者以名聞後不果行
丙申知桂州沈起言已遣兵防托蠻賊慮辰州討賊將
卒不分有無罪惡一例殺戮乞下章惇約束從之 上

批聞河州修城禁軍弓箭手廂兵自興工五十餘日緣身衣裝漬裂殆盡雖日得雇錢而募人助役尤為勞費可量與支賜禁軍人給絹一匹弓箭手廂兵人給錢千仍候分屯日給之 賜江南東路常平米七萬石賑濟災疫 詔都水監司農寺提舉在京諸司庫務自今並許直牒閣門上殿 沈起言交趾劉紀欲歸明不納必恐如儂智高上問執政交趾事僉以為未可許劉紀許劉紀交趾必爭王安石曰聞溫杲已來乞候溫杲到商

量取旨上曰交趾可了但恐沈起了不得安石曰起自以為易了然兵事至難誠恐起未易了馮京曰交趾安能一心但恐其人相與之固不如羌人爾安石曰交趾所任乃多是閩人必其土人無足倚仗故也

二十七日事

丁酉權三司使薛向請止絕秦鳳路轉運使蔡延慶置場減價出賣鹽鈔從之先是延慶言熙州築城寨一役方興屯戍甚衆洮岷大兵費用日廣臣已權一時之急以東南鹽鈔依市價募商人入中見錢雖所賣價稍虧

元數而為利甚厚至是向言始有旨以陝西解鹽歲入
不過三百萬緡分於兩路州郡秦鳳歲當一百七十一
萬緡今秦鳳未滿歲而入中錢已四百六十餘萬緡溢
兩路之額而延慶更欲權宜損價非獨輕動舊法兼已
溢定額為害不細故詔止絕 熙河路經略司言收復
河岷洮等州逐處蕃部各懷震怖當職官吏因此往往
擅發蕃部及牯牛驢負載官物乞誠約之詔熙河路諸
州城寨官司應當差牛驢負載官物並稟於經略司如

緩急邊寇聽一面差發仍以正兵兼蕃兵其擅差及科配者並從違制論提舉官不覺察奏裁仍許人告厚賞之

上批熙河一路自用兵以來誅斬萬計遺骸暴野遊魂無依朝廷子視四海所宜哀矜可遣勾當御藥院

李舜舉往收瘞吊祭之仍設水陸齋為死者營福焉

舊紀

書遣內侍掩熙河暴骸新紀但書詔不書遣內侍

詔施州蠻聽以金銀平估

實直質官糧米如七年不贖即變易之初施州蠻因災傷以金銀倍估直質米于官官司不能禁至是始令估

實直以易之 詔中書自今命官過犯及編配人所犯
情理分輕重次輕次重四等刑名著為定例

戊戌于闐貢方物

兩紀並係
之年末

詔通判河州太常博士

李山甫送審官東院與監當坐徧與執政書飾言邊事
蔽覆河州官兵違節制殺降故也 畫天下州府軍監

縣鎮圖所上十八路圖一及副二十卷上言四夷但訓
練兵精不常屯守有警乃應今中國反不如王安石曰
比來中國誠不如四夷今四夷又不如古中國若盡什

伍其人使隨處有以待敵乃古中國之法也 太子中

允館閣校勘黃履權監察御史裏行

是月廢梅州入程鄉縣隸湖州省熙州馬踪寨

新紀於此月末

書占城降於交趾舊紀無之今不取

詔都大提舉大名府界金隄范子

淵等開修直河

此據會要七年六月所載增入其詳具七年六月末六年六月十七日十一月

八日七年一月五日十月十一日並當參考汴河隄岸司言汴水添漲其京

西四斗門分減不退以致開決隄岸今近京除孔固斗

門減水下入黃河雖有孫賈斗門減水入廣濟河然下

尾窄狹不盡吞伏乞萬勝鎮舊減水河汴河北岸修立
斗門開淘舊河剏開生河一道下合入刁馬河役夫一
萬三千六百四十三人一月畢工從之

此據河渠志六年十月事今附

末月

欽定四庫全書

續資治通鑑長編卷二百四十八

宋 李燾 撰

神宗

熙寧六年十一月庚子朔中書言奉旨置簿考察内外
官司功過如遇差除檢錄進擬内有特旨者欲自今亦
同檢錄從之 殿直張榮垂拱殿起居唐突自陳先因
罪勒停有女賣入禁中詔貸其罪令內東門還其女

王安石言薛向取陝西六年錢穀金銀匹帛出入細數
兩本擾人至多請罷之上曰中書令向根究陝西錢帛
出入必是省中舊文字不齊整無由見得安石曰省中
舊文字雖不曾磨勘然大數亦可見省中法禁嚴密如
此尚不備即外州何由備有所勾追得替專副須及七
八年以來凡幾人幾日乃可得了兼如此無可了之期
昨比較薛向界解鹽一事尚自騷擾人衆終不能了而
降朝旨罷之今此數十倍於解鹽文字如何得了上曰

如何見得陝西錢帛增虧數安石曰薛向在陝西時錢帛不闕後來方闕若由人措置失措置遂致闕少即薛向但檢尋在省文字根究自在陝西時施行事後來如何變改遂致闕少若不因施行有異遂致闕少止是年歲豐凶事宜多少所以見在錢物豐約不同即亦大略可見不須一一點磨出入細數乃可見也乃令罷省牒所索文字後數日上又言陝西財用闕乏若有邊事何以待之安石曰有邊事亦不須增費前此邊事若朝廷

但令所在堅守城寨勿與敵角徐練兵擾之使不得息
彼數次點集自無復能動即秉常成禽爾如此則見兵
見糧足以辦事不務出此而隨事紛擾應之是以費多
而事不成上曰才有事便來乞兵安石曰太祖時將帥
有令兒男乞兵者乞不得哭而去然終無敗事今將帥
乞兵與不與在陛下上曰太祖用郭進今恐難得安石
曰郭進有何難得舉事則才自出如王君萬方其為指
使時孰謂其可使因事立功然後知其可用爾上曰今

日外夷誠可如此待之安石曰中國廣大人衆財富加以陛下聰明憂勤天下若措置不失即雖冒頓亦何足畏漢高祖為冒頓所困亦以中國倦兵人思休息而已使漢高祖有今日天下必不復畏冒頓也上曰天使中國有勝外國之道但後世倒置爾安石曰誠如此詩以外國強中國弱為牂羊墳首明非天地之常理也

辛丑增置岳州平江縣丞一員

壬寅詔河北緣邊安撫司指揮歸信容城兩縣令尉自

今遇北界巡馬並徐行襲逐毋得相傷初北界巡馬過白溝而歸信尉臧景射傷涿州小鷹軍使固德等故約

束之

七月二十五日日錄韓縝奏留馮行已以為若罷行已北人以為射殺人故罷即愈驕若復來必以

為有計議北人更疑上曰行已奏報亦不覺其昏錯或曰昨對北人言展拓城池是錯上曰昨曾孝寬所帶去使臣乃是張利一所辟人不過聽此輩語故爾縝退余白上孫永言臧景者邢佐臣壻疑射殺人或非全屬南界地分此事未可知然不可不察又白上趙子幾云人甚稱張利一臣為言朝廷所知利一實事數條乃言都

不知有此蓋雄州使臣盡是利一所奏辟故如此此事與臧景相關附見待考

詔今冬不閉

汴口令造棧截浮凌先是權判將作監范子奇言汴口

每歲開閉勞人費財不惟民力重困兼閉口後阻絕漕運乞每至冬更勿閉口以外江網運直入汴至京廢罷轉般其年計必大有所增操舟兵士自可減省上下酒稅課利亦當以故增多公私便利無越於此若謂經冬不閉致湮河道緣每歲閉口多在冬深已是霜降水落迨至斷流亦有澄沙却遇春水衝注別無停積若後當淘浚修疊自可約定年限權行閉塞比之歲歲興功煩省異矣乃詔汴口官吏相度卒如子奇議時高麗遣使

入貢令自汴汭流赴闕初議不閉汴口上曰舊閉口良有所費安石曰聞有時費至百萬上曰數年前若言不閉汴口即人須大駭乃令不閉汴口及勘會遞年所費閉口人工物料進呈上曰聞都省有碑言溝洫前通於汴水不知自何時如此河底漸高安石曰今溝首皆深汴極低又觀相國寺積沙幾及屋簷則汴河如此漸高未久上曰有汴河來已久何故近如此漸高安石曰舊不建都即不如本朝專恃河水故諸陂澤溝渠清水皆

入汴諸陂澤溝渠清水皆入汴即沙行而不積自建都以來漕運不可一日不通專恃河水灌汴諸水不復得

入汴此所以積沙漸高也

沈括筆談頗與王安石之言相表裏今附注于此待考國

朝汴渠發京畿輔郡三十餘縣夫歲一浚祥符中閭門祇候使臣謝德權領治京畿溝渠權借浚汴夫自爾三歲一浚始令京畿民官皆兼溝洫河道以為常職久之治溝洫之工漸弛邑官徒帶空名而汴渠至有二十年不浚歲歲堙澁異時京師溝渠之水皆入汴舊尚書省都堂壁記疏治八渠南入汴水是也自汴流堙澁京城東水門下至雍邱襄邑河底皆高出堤外平地一丈二尺餘自汴堤下瞰民居如在深谷熙寧中議改疏洛水入汴予因出使按行汴渠自京師上善門量至泗州淮岸凡八百四十里一百三十步地勢京師比泗州高十

九丈四尺八寸六分就京城東數里渠心穿井至三丈方見舊底驗量地勢用水平望尺幹尺量之亦不能無小差汴渠堤外皆是出土故溝予今決溝水令相通時為一堰節其水平其上漸淺涸則又為一堰相齒如階陛乃量堰之上下水面相高下之數會之乃得地勢高下之實

癸卯麟府路走馬承受全惟幾請罷廂軍為弓箭手從之初河外多曠土上遣帶御器械王中正募民為弓箭手以實之用省戍兵轉運使趙子幾因上薦募廂軍策而不較廩給之費至是罷之

甲辰天章閣待制權三司使薛向為龍圖閣直學士洮

河闢土其費不貲向悉力營辦人以為難手詔賜銀絹各三百曰卿留心邊務覩此成績當慰忠懷向因請戒將帥減溢員罷冗兵省浮費節橫斂且以越職為憂上復諭以手詔曰比選卿主領國計今能建明不失機會乃職所宜何越之有

乙巳詔河東路經略司新招弓箭手墻院屋宇等並官為修築如願請材木自備工者聽 又詔辰州南江軍前並賜特支錢有差

丙午同察訪京東路常平等常州團練推官呂升卿為

太子中允權發遣京東路轉運判官

司馬記開云升卿察訪京東還除淮

南轉運判官轉運判官必須升朝官為之借以中允尋召說書今日錄乃不云借當考

詔軍器

監以殿前為軍司所相度鞍轡樣計在京諸軍馬數造

給初馬軍用大鞍不便野戰至是上始以邊樣皮韉小

鞍用木鞍長韁回旋轉射得盡馳驟之技仍選邊人習

騎者隸諸軍後上批昨降鞍樣慮數多計置未集聞諸

軍亦有私鞍大約及新樣若能自置即給價錢

志有此六月二

十七日
可考

上因懿洽捷報論及首惡慮走匿不可得安石曰
師完威震外夷無敢保匿者恐須禽獲上曰如摩正官軍非不
威震然終敢保匿何也安石曰自河州殺降即安敢保信邊將
故死與摩正相保上曰殺摩正前何以不降安石曰時未有迫
切之患故不降今迫切仍不降恐當以殺降故也

丁未王安石言以濬川杞濬黃河自二十八日卯時至
二十九日申時凡增深九寸至一尺八寸請以杞濬汴
從之上曰果如此即大省夫力物料聞河北一軍有用

夫五千而本軍丁不過五千一夫至用錢八貫歐陽修
常以為開河如放火不開河如失火果用夫勞民如此
即不如不開河安石曰若兩皆為害即開河用夫與放
火失火無異若以萬人一歲之力能除千人百歲之害
即猶放火失火之比也今以萬人之力除十萬人之害
即決須為之易所謂毒天下而民從之者以其雖毒之
終能使之安利故初寒暑雨非不毒也若無初寒暑雨
亦無以成物也故亭之毒之乃為天道豈可但亭之而

已

此據王安石日錄十一月八日事

先是有選人李公義者建言請為

鐵龍爪以濬河其法用鐵數斤為爪形沉之水底繫絙以船曳之而行宦官黃懷信以為鐵爪太輕不能沉更請造濬川耙其法以巨木長八尺齒長二尺列於木下如耙狀以石壓之兩旁繫大絙兩端矻大船相距八十步各用牛車絞之去來撓蕩泥沙已又移船而濬之王安石甚善其法嘗使懷信濬二股河懷信用船二十二隻四時辰浚河深三尺至四尺四寸水既趨之因又宣

刷一日之間又增深一尺懷信請以五百兵二十日開六里直河順二股河水勢用杷濬治可移大河令快上許依懷信所擘畫安石請令懷信因便相度天臺等埽作直河用杷疏浚上亦許之

此段見日錄五年十月九日今移入此河渠志云鑿

直河七里日錄云六里當并考

它日又言開直河一道計省却九百萬

物料三百萬夫功如懷信所造濬川杷即處處危急可用直河所以有不可開者只為近水開數尺即見水施功不得今但見水即以杷濬之無不可使水趨直河去

處卽一歲所省凡幾百千萬物料工夫又汴河廣濟河諸斗門減水河自此更不須計工開浚但製百千枚杷

永無淺澱也

此段見日錄五年十月十九日今移入此更須子細考詳恐日錄年月亦自差錯或

非五年事河渠志云范子淵上試浚川杷之功詔賞懷信度牒十五道公義與堂除亦係之五年九月後須更參照別修開直河本末其七年二月五日并六月末又十二月十一日河渠志五年九月賞塞決河功後便載李公義事云節度推官李公義獻鐵龍爪揚泥車法以疏浚黃河內侍黃懷信以為可用而未盡善中書請令懷信公義同度之杷制舟尾以大繩垂鐵龍爪水中棹工急棹乘流相繼而下一再過水已深數尺或謂禹所浚川者也故名曰浚川杷懷信等請於清河港新開兩河港相迎處鑿直河七里試之以觀其効詔春首興

工是歲范子淵上試浚川杞之功詔賞懷信以度僧牒十五道公義與堂除六年王安石為上言用杞浚二股河及閉塞魚肋河之利日今諸埽疏去沙觥即水自移徙若不輟工雖二股河上流可使行地中上乃令與公義改京官七年二月五日子淵言疏二股及清水鎮河道已快而魚肋河三道漸背去可塞即河併入清水鎮二股河行流所退出民田甚衆詔子淵俟浚深即塞之三月劉璿奏濬川杞疏清水鎮河道已深闊并塞魚肋河已訖功於是詔大名府安撫覆實以聞乃遣子淵提舉浚事自衛州至海口黃河六都大司各減官一凡埽岸官皆度減之而子淵劉璿朱仲立以浚功各遷一官餘減磨勘賜帛有差按十年三月十一日公義改京官四月三日差子淵提舉七年十二月十一日賞子淵等獨賜懷信度牒與公義堂除不見於日錄當考

戊申熙河經略司奏諸將收復河州破常家族及隨王

韶往露骨山下先登用命鬪敵効首級計三千餘人詔
推恩有差

庚戌屯田員外郎同判都水監侯叔獻兼提舉緣汴淤
田錄三班奉職馬和子祐慶為右班殿直即給俸和
攻河州先登城流矢中額而死故也又詔河州功賞

獲一級加賜絹五匹其應接大兵破蕩部族者亦如之
提舉司天監所言據造厯衛朴等言測渾儀景表刻
漏差誤不可為則詔元管勾當官楊茂先送開封府効

罪以聞

壬子司農寺請襄邑酸棗尉氏長垣封邱太康陽武開封祥符九縣保甲教習陣法依咸平等縣例入見從之
權罷今年畿內保甲聚教

癸丑冬至奉安中太一神象德音降天下繫囚雜犯死罪從流流以下釋之應諸路災傷民戶本名稅物失訴違省限不該檢放者監司體量檢放其闕食之民安撫提舉司優加振救無致流移除河北路負官物已指揮

外餘路負官物被災傷放稅及五分以上並權停先是上以久旱欲因冬至發德音順承太一之貺手詔令輔臣相度王安石等請如詔旨擬合施行目進呈上於禁中增入檢放一節蓋上察於政事卹民如此

乙卯詣集禧觀中太一宮酌獻

戊午權武昌軍節度推官崇文院校書王安國為著作佐郎祕閣校理故事崇文院校書二年乃除館閣校勘安國以參知政事馮京王珪薦其學行故特有是命

司農寺言開封府界保甲以五家相近者為一保五保為一大保十大保為一都保但及二百戶以上並為一都保其正長人數且令依舊即戶不及二百者各隨近便并隸別保諸路依此從之

八月二十七日戊戌可考

上批陝西

義勇未曾排定近降新法未該行使今涇原路已如此行使可令經略司分析具奏

此據御集當考究竟二十日上批合參照

熙

河經略司言包順乞以獻鹽井功狀錄用其子詔王韶勘會鹽井既係衆獻何故包順今獨請賞若獨賞順則

其餘有無爭競及令韶相度鬻鹽條件以聞 契丹欲
爭蔚應朔三州地界事有萌芽上深以為憂王安石白
上契丹無足憂彼境內盜賊尚不能禁捕何敢與中國
為敵且彼坐受厚賂有何急切乃自取危殆上曰緣河
北亦無以支吾安石曰河北人物稠衆但措置有方不
患無以支吾事緩即緩措置事急即急措置

呂惠卿家傳載惠卿

語云今敵亦未必至此借令起事以中國之大急則急
應緩則緩應與安石此語略同附注八年四月五日丙寅
蕭禧入辭下上曰彼人衆奈何安石曰人衆尤非所患若人

衆而有能率衆之主分別材鄙勇怯各當其分即可畏
若無能率衆之主分別材鄙勇怯各不當其分即直易
擾敗爾患在於措置無方不能分別人材鄙勇怯所以
率衆非其道爾不患彼人衆彼人衆乃所以易擾敗也
上曰先朝何以有澶淵之事安石曰先朝用將如王超
亦嘗召對真宗與之語退以其語與大臣謀之臣讀史
書見當時論說終無堅決上下極為滅裂如此何由勝
敵又太宗為傅潛奏防秋在近亦未知兵將所在詔付

兩卷文字云兵數盡在其中候賊如此即開某卷如彼
即開某卷若御將如此即惟王超傳潛乃肯為將稍有
材畧必不肯於此時為將坐待敗衄也但任將一事如此
即便無以勝敵上以為然上因言日力可惜若遲一日
即失一日事安石曰有遲一日而失一年事者上曰若
排保甲義勇又須待農隙即是有遲一日遂失一年事
者安石曰遲一年事即有遂不及事者上又以夏人為
憂曰若有北事則兩面俱受敵奈何安石曰朝廷未宜

有北事若有北事夏人不能勝當時中國今日中國與
夏人豈止如元昊與當時中國以此不足慮也後數日
上又言契丹如此旅拒奈何安石曰契丹齟齬爭尺寸
地界其略可見何足憂不知陛下憂錢糧不足耶憂人
衆不足耶憂無人材與計事耶上曰人材既未陶冶成
就錢糧亦誠不足人衆又未訓練安石曰事有緩急故
措置有緩急若有緊急即急要訓練人衆亦不為晚就
令契丹便欲絕盟非年歲未能大舉臨時應變足可支

吾若論錢糧即因緊急經度亦不患少但今未急故亦
不須汲汲爾惟人材乏少最是急切之慮然因事乃見
人材如熙河事即熙河人材頗有可見者懿洽事即懿
洽人材頗有可見者陛下若明見物情無所蔽塞令有
能有為者無顧望之意無卷懷之患人人各以赴功趨
事為欲則人材不患不足任使也人情上不過為道義
中不過為功名下不過為爵祿陛下若能以此三者待
天下之士各不失理分即無賢不肖但有寸長皆為陛

下盡力即無能之契丹何足慮上以為然

朱史取陛下若明見物情

以下語附七年二月
丁丑今仍見本日

庚申王韶遣本琳沁固雲沁巴詣闕皆岷州歸順首領也上批義勇保甲條近曾孝寬等相度河州一路利害參議立定其陝西諸路慮事體不同故令經略安撫司參議未見奏報而聞已有施行者恐司農寺兵部等處行遣差誤可令具析自承指揮後行遣次第以聞

集御

在二十一日實錄在二十二日
今從御集并十九日上批可考

遣上內供奉官李憲

往太原府代州勾當公事

此據御集當考

辛酉詔永興軍河中府陝解同華鄜延丹坊邠寧環慶
耀十五州軍各依元刺義勇外商號州保安軍並止團
成保甲 詔定武臣差遣法以其仕歷資任為六等陞
一等為權陞兩等以上者為權發遣並通計二年為一
任若特恩陞改者不依此 振武軍節度使李璋自鄆
州還朝卒于襄州贈太尉謚良惠錄其子五人各遷一
官未仕者三人為左侍禁璋強敏好讀書未嘗校家之

有無及卒其弟駙馬都尉瑋欲貸襄唐許三州官錢各千緡以治喪事後輸於左藏庫上曰瑋故章懿太后家也其以所貸錢賜之

壬戌右正言知制誥兼侍講檢正中書五房公事呂惠卿提舉制敕庫先是檢正刑房公事李承之請置庫因以承之兼領所貯五房文書難止令一房提舉故命惠卿領焉 詔荆湖北路提點刑獄李平等具析妄奏監鼎州稅借職王晏昏懦不實因依以聞晏赴三班院

體量堪釐務也 太宗正司言宗室全闕官馬及半闕
從人者聽依朝旨免赴朝從之 上問養馬利害王安
石曰今坊監以五百餘貫乃養得一馬若令洮河蕃部
養馬所費必不至如此之多兼得好馬因地宜馬又蕃
部以養馬為業極便利所省錢計不少而坊監地賦民
所收地利又不少上因論三代政事以車馬為急安石
曰今用車即不須用馬但以人挽之足矣以人挽車省
芻糧無奔警未必不勝用馬辟如古用簡冊今用紙雖

三代聖人復起必不復用簡冊恐以人挽車亦如此上
曰事但有理即可行三代以前聖人但隨時制法故用
馬爾上又曰天使中國有勝外國之道但後世失其道

爾

此年十二月十八日又
明年二月十二日可考

癸亥上論熙河糧斛事欲以逐路財賦付經畧使自管
然卒不行上以農事為急王安石曰家可以資國國可
以資天下天下必資天地上曰若設法移民使就寬鄉
亦王者所以生財闢土之道也

甲子權發遣秦鳳等路轉運判官贊善大夫蔡朦為永興軍等路轉運判官同察訪永興秦鳳等路常平等事大理寺丞李察為太子中舍權發遣秦鳳等路轉運判官朦與蔡延慶共事而不相能故徙朦以察代之

朦延慶不相能

相能據延慶本傳緣以軍須朦發張守約兵朦奏之考按事實乃不然今但云不相能而不明著其所以十月十一日延慶加職

涇原路經略司言弓箭手人員立功換班

行名下土田自今勿以自隨止令子孫或佃戶刺填弓箭手從之 高陽關路都總管司言體量到諸州軍依

新法教閱已成倫叙不聞有避教閱逃竄者詔走馬承
受王延慶張瑾具析以聞先是降諸軍教閱新法分上
中下軍弓弩斗力及射親彊槍刀等第而延慶等奏有
軍士避教閱投北界者故詰之 潭州言西上閤門使

前知桂州蕭注遺表乞子充三班奉職孫舉三班借職

從之於是上批注昔嘗有功長子刳服闋日更特與循

資仍賜絹三百匹

注本傳云注不肯取交州據魏泰東軒錄則注實言交州可取故復用與

本傳不同歿後恩意如此則注本傳或不得其實當考注罷桂州在正月二十七日辛丑

乙丑詔同判都水監侯叔獻權發遣監丞俞充知主簿
劉璿各陞一任權提點開封府界諸縣鎮公事吳審禮
劉淑各減磨勘二年並以兼提舉淤田有勞也 熙河
經略司言鈐轄王君萬乞以轉官恩賞回授父母詔特
推恩不許回授 又詔三司於永興秦鳳等兩路每年
封樁解鹽錢內借鈔計百萬緡付秦鳳等路轉運司計
置熙河糧草仍許詳酌邊儲緩急增損所定鈔價上怪
陝西兵少財用不足王安石曰此事已委薛向根究然

日下闕乏湏應副令及時收糴上又以為轉運使非其人曰使此輩理財舉事未得安石曰陝西財用不足亦恐未可歸咎監司必是自有許多使處如熙州用兵數亦不多而所費錢斛乃如此之多緣既用兵即所費必如此至於小大失計亦或有之未必便能致財用闕乏也上曰一事失計往往便至數十萬貫錢

丙寅左藏庫使董仲寶為皇城副使內殿崇班李實為供備庫副使以章惇言仲寶等在叙州與蠻賊戰有功

故也

詔開封府雪寒京城內外老疾幼孤無依者並收養於四福田院自今準此 又詔涇原路年例外益以鹽鈔錢二十萬緡付經略司市糧草封樁

丁卯河東都轉運司請汾石等十二州軍和糴糧草許以錢布中給從之

戊辰遣官謝雪

詔流內銓前廬州觀察推官江衍循

一資會稽縣主簿葉表等六人各與堂除差遣並以檢

括修州鑑湖之勞也

宋類苑十一月吏有不附新法介甫欲深罪之上不可介甫固爭之

曰不然法不行上曰聞民間亦頗苦新法介甫曰祁寒暑雨民猶有怨咨者豈足顧也上曰豈若并祁寒暑雨之怨亦

無邪

是月廢儋州為昌化軍崖州為朱崖軍萬安州為萬安軍以昌化感恩陵水寧遠吉陽及華州渭南縣並為鎮信州永豐鎮為縣置熙州狄道河州枹罕縣

十二月庚午朔章惇言衡永等州溪峒徭人因招諭納土乞並為省民從之

辛未罷詳定諸司庫務利害局詳定官國子博士呂嘉

問陞一任左藏庫副使劉永淵與樞密院指射差遣

壬申觀文殿學士戶部尚書判南京留司御史臺張方
平知陳州 三司言新法所增吏祿除舊請外歲支錢

一十七萬一千五百五十三緡有奇

實錄止云三十萬
今從沈括筆談詳

書詔以熙寧四年後坊場稅錢撥還不足則以市易市
例等錢補之仍令提舉帳司歲考支收數上中書時內
自政府百司外及監司諸州胥吏皆賦以祿謂之倉法
京師歲增吏祿四十一萬三千四百餘緡監司諸州六

十八萬九千八百餘緡然皆取足於坊場河渡市例免
行役剩息錢等而於縣官歲入財用初無少損且民不

加賦而吏祿以給焉

此段於三年八月二十七日撥出
附見沈括云天下吏人素無常祿

惟以受祿為生往往有致富者熙寧三年始制天下吏
祿而設重法以絕請託之弊是歲京師諸司歲支吏祿
錢三千八百三十四貫二百五十四歲歲增廣至熙寧
八年予為三司使日歲支三十七萬一千五百五十三
貫一百七十八京師舊有祿
者及天下利祿皆不預此數

樞密院承旨司言野戰

及槍刀手之類自今毋得以五服內親對試從之

詔諸路奏賞自今功狀並具將官使臣元將出戰兵斬

獲輸折數以聞贈荆湖北路鈐轄司指使陳昌言陳昌朝為光祿寺丞錄其子各一人為郊社齋郎以攻狃狔寨死事也

癸酉詔殿前馬軍司及諸路州軍牙教所射草人依宣試格改為草樁仍遠二十步 命河北同提點制置屯田使閻士良專興修撲樁口增灌東塘淀灤先是滄州北三堂等塘灤為黃河所注其後河改道而灤遂填淤程昉嘗請開琵琶灣引河水灌之功不可成至是士良

建言宜堰水絕御河引西塘水灌之故從其請而有是命

甲戌御史盛陶言昨吳安持請民輸錢免行都提舉市
易呂嘉問被詔與府司官詳定利害而嘉問過為苛察
牢取微利雖稍排定所費之外掊斂過多乞應免行錢
更加均定惟給行人常費之外其餘中下戶並與蠲放
不報

朱本
削去

詔淮南東路轉運司募闕食貧民興修揚

州江都高郵天長界河及古鹽河

乙亥上謂輔臣曰李靖團力之法以三人得意者為隊已令李浩試之懿洽二州疑亦可行王安石等曰三代至於漢魏皆以五人為伍至如三人若一人戰死押官執刀在後即斬二人恐不可然此法亦可增損為用上曰唐太宗問李靖兵法之要靖以謂不出形之使敵從之一言而已此誠簡要又曰高宗伐鬼方三年而周公東征亦三年何其久也安石曰古人欲其師之完故不急務又其敵有彊弱故難克也如管蔡乃武王所使以

監商人其任至重必非常才於周之盛時乃能率衆叛
幾危王室蓋非易克者也上曰君子小人各有道所以
能相敵安石曰誠如此以黃帝之聖神而與蚩尤七十
戰而後能勝者由此故也上曰以武王周公大聖人商
之餘俗至歷三紀然後世變風移衛文公蟋蟀之詩乃
能止奔何也安石曰商人之俗習於紂惡之日久矣為
其所化如怨望周人不使之如商革夏有服在庭以利
口亂正非如止奔之易也上曰文王江漢之域無思犯

禮衛文公亦能止奔使國人不齒何以異此安石曰衛

文公區區一國之君耳但能正身以御下得賢才而任

之其地至狹苟能躬行禮義庶恥而所置卿大夫同德

協心則彼淫奔之俗衆人之所惡者止之固不為難非

若文王之時身為諸侯而能使江漢之人無思犯禮也

命提點倉場沈希顏御史臺推直官穆珣裁定在京

冗占剩員他日上謂王安石曰剩員乃至八萬人多為

官員冗占見呂公弼說其父夷簡作某官當時只有三

欽定四庫全書

續資治通鑑長編

卷二百四十八

人當直安石曰夷簡作官若是稍近上只三人當直恐

傷國體人主尊如堂羣臣如陞上下有等威乃可臨正

庶民若甚削弱曾不如富人不知何以為堂陞之勢當

時果如此亦未可為法且今日官員所被役兵皆有常

數未見過當所患在非其人而已如呂夷簡為大臣納

貨賂廢壞朝廷百事便與一人當直亦不消得上乃笑

此段見七年二月七日今附見

丙子給度僧牒二千付都提舉市易司募人入錢為秦

鳳路轉運司糴本

丁丑詔京官為提舉官者並為同提舉梓夔路察訪

熊本言江安寨兵官以商議買田為名誘三里夷人斗

設等至寨因詰問傷殺兵官主名其人自以罪大即拔

刀唱殺尋斬訖斗設等劇賊也上曰此等夷人固不可

赦然誘而誅之或為它日之害謂之唱殺特以此為名

耳後本乞賞功上弗許蓋本以檄召戎州司戶參軍程

之元權領江安縣密圖之之元即召諸酋見於廷問景

欽定四庫全書

續資治通鑑長編

卷二百四十八

左藏安在諸酋呼噪不服因殺九十餘人斗設手刃思

忠者械送瀘州凌遲斬之以祭思忠之元眉山人也

云無照據削去程之元事今復存之

詔司農寺齊充州民冒佃泰山禁

地量地肥瘠立租令依舊居佃

戊寅新權發遣淮南西路提點刑獄陳樞言熙寧五年

蘇湖大稔米價視淮南纔十之五客船販米以緣路場

務收往來力勝故蘇湖之米不至淮南乞權令免納從

之樞又言兩浙第五等戶約百萬出役錢裁五六萬緡

錢寡而所敷甚衆且第五等舊無役請得蠲免詔除之

此據本志附四年十月鄧綰言李瑜周約後按樞以六年十二月方為淮西憲今附見

詔熙河

路舉人不以戶貫年限聽取應熙州以五人河洮岷州各以三人為解額又賜熙州新修東山禪院名曰慈雲東湖曰慧日

庚辰贊善大夫蔡朦提舉興修永興軍白渠

朦此時任永興運判

實錄脫之當考

修撰經義所檢討洪州進士徐禧為鎮南軍

節度推官中書戶房習學公事禧與吳著陶臨皆以白

衣為修撰經義所檢討至是以選人入中書習學行
檢正事初呂惠卿薦禧所為治策二十四篇上善之曰
禧言朝廷以經術變士人十已八九變矣然盜襲人之
語而不求心通者亦十八九此言是也觀禧文學曉政
事宜試之於有用之地王安石曰中書檢正官如章惇
輩朝廷當即有差除後更用人如有不稱艱於退絀欲
置人為習學上以為然於是以禧為之中書五房習學
公事自此始 上復論司馬孫吳及李靖團力之法王

安石曰古論兵無如孫武者以其粗見道故也如日有長短月有死生五聲之變不可勝聽五色之變不可勝觀奇正之變不可勝窮蓋粗能見道故其言有及於此上曰能知奇正乃用兵之要奇者天道也正者地道也地道有常天道則變而無常至於能用奇正以奇為正以正為奇則妙而神矣安石曰誠如此天能天而不能地地能地而不能天能天能地利用出入則所謂神也神故能以奇為正以正為奇也

王安石對見日錄
十一月二十五日

上善

李靖結隊法召賈逵問之逵以為非詔中書密院同議之安石曰今但結三人為隊又結五人為伍相搏執以觀其孰勝則其可用與否立見矣上乃令郭固與殿前

司各為一法試其可者

舊本十八日丁亥又書詔賈逵郭固教習比試隊伍法及令程

昉於沿河採車材按賈逵郭固比試隊伍法已具此矣今依宋本削去丁亥日所書五月八日庚戌已令諸路教三人為隊此又云云當考本志云上患諸將軍行無行陣之法嘗曰李靖結三人為隊必有意李靖深曉兵星書羽林皆以三人為隊靖非無據乃然以為靖能勝令賈逵郭固試之本志附之五年當考外夷又數稱黃帝兵法必曉古人伍法其用三人為隊

或必有意安石曰後世無知兵者靖能結三人為隊以當衰亂散鬪之敵宜其每勝比之韓信則已不及至於黃帝兵法必非靖所能知蓋自黃帝以來即有伍法豈容歷代聖人智不及靖而不能結三人為隊也上曰韓信以數十萬當項羽十萬靖以萬人當頡利一國靖未必不如信安石曰自蚩尤以來未有如項籍者頡利乃衰亂之外國李靖率習戰之士深入敵地而發其機又乘其不戒則其勝之固易上曰兵固欲措之於易勝安

石曰措易勝與難勝乃為奇措易勝與易勝不足為奇也馮京曰陛下論兵高遠非羣臣所及安石曰天錫陛下聖質高遠與堯舜湯武固無以異論兵誠為高遠然先王雖曰張皇六師克詰戎兵其坐而論道則未嘗及戰陣之事蓋以為三軍五兵之運德之末不足道也孔子亦曰俎豆之事則嘗聞之矣軍旅之事未之學也以為苟知本矣末不足治也上曰事亦有趨時者如宣王乃以北伐為先安石曰宣王所以北伐乃以能分別君

子小人用吉甫張仲故也若十步之內君子小人曾無所分別不知如何能勝獵狁然則先王所務又有在北伐之先者陛下修身齊家誠無愧於堯舜湯武臣若見陛下少有闕失豈敢顧望不諫然即位六七年未能成堯舜湯武功業必有與堯舜武湯不同處詩曰思無疆思馬斯臧思無邪思馬斯徂人君苟出於誠正則馬可使臧可使徂而況於人乎然則無人為將率非陛下所患況今日四夷類皆非豪傑無足以累聖慮者上以為

然

已上並見目錄
十二月二十二日

上又論兵以為能知陰陽五行之

理而役使之則盡矣要在通理而已安石曰天地乃為

陰陽五行所使通陰陽五行之理是所謂精義入神以

致用所為無不可者何但兵而已

亦見二
十三日

上又言符堅

以百萬之師為晉所敗安石曰堅號為英主然其實疎

暗王猛符融苦諫以為慕容垂常幸國家之災腹心之

患也不知慮此而遠勤吳會此乃自敗非晉能敗之也

上曰垂必有以中其心安石曰堅欲平晉垂勸之平晉

然後封禪此乃堅所欲故為垂所惑也上曰此在人君
聽納明與不明耳苻融王猛以晉為不可伐而堅不聽
故敗晉武帝欲平吳而一國之人皆以為不可獨用張
華羊杜三數人之言故勝然則聽納之際可不審乎

辛巳睦州軍事推官葉適平興縣令編修三司令式刪

定官張元方興平縣尉王震並為中書習學公事適禮

房元方吏房震刑房

葉適七年六月丁亥檢正十月丁丑死張元方未詳王震開封人

荆湖北路轉運使孫楠言招諭北江下溪州刺史彭

師晏內附錄其地里四至戶口數以聞詔章惇詳度處置

壬午提舉印造編勅所言新勅刊本將畢慮中書樞密院更有合入條約及續降條約乞候至來年頒降從之熙河路經略司言熙州西羅城已置蕃學曉諭蕃官子弟入學

朱史載王安石云云此乃通遠軍事已見彼時今刪去

又言固密族首領

六人助包順轄烏察等戰有功詔各轉一資餘獲級重傷者轉資賜帛有差納克通身死其子結幹沁兼本族

巡檢 詔知桂州沈起融州撫納蠻人本以裁省煩費
今乃創建城寨其支費比舊孰多各具利害以聞時起
欲於新地內創建五七寨大者屯兵六七百人小者三
五百人故也

可併十月
庚午

癸未熙河路經略司言岷州入買糧草商人多願請見
錢京鈔乞依熙河通遠軍例付見錢鈔三十萬緡詔給
鈔十萬緡乃令三司立加饒錢數以聞 詔在京納免
行錢如有訴未便者都提舉市易司受理以聞 賜准

南西路轉運司常平米三萬石募飢民興修水利

甲申遣職方員外郎林積監疏汴河噎凌京東西路
安撫司言鄆州旱民輸常稅不辦乞權倚閣見欠賒糴
斛斗從之

乙酉大理寺丞知光化縣葉康直前權廬州觀察推官
江衍雍邱縣尉時孝孫秀州司戶參軍袁默並為司農
寺勾當事以司農寺所總事目頗繁間遣屬官出視諸
路常平等事故增員並從判寺曾布辟也

中書言增開封府等處吏祿以行重法上曰異時吏不
賦祿而受賕輒被重劾今朝廷賦祿而責人可謂忠恕
矣它日上又稱祿法忠恕馮京曰天下無事乃可以行
此太宗時嘗宣諭州縣官有道理少取些錢無道理莫
取上曰當是時接五代財用不足王安石曰縱財用不
足吏亦人非不衣不食而治公事既衣食即必有所出
自可以法收斂以此賦給上曰當是時亦自未可正法
也三司言陝西邊穀踊貴請責轉運司裁損其直上

曰窮吾國用者兵冗耳不思議此而止於糧草校計毫釐失其要也宜與樞密院同議移軍近裏就食以省邊費詔諸路安撫司依轉運提點刑獄提舉司隨本路分定州軍提舉教閱義勇保甲入內西頭供奉官黃懷仁昨修金明池御座龍船乞賜度僧牒酬賞詔三司賜錢十萬

丁亥秘書丞呂大忠檢詳樞密院兵房文字都水監丞王令圖減磨勘二年以本監言令圖叙白馬縣界鋸

牙免河勢暴溢之患也 同管勾外都水監丞程昉言

國家三歲一祠圓丘齋宿之地常用帘幕創成帷宮謂之青城綵內頗為勞費若因綵內材本量椽栱瓦箔等及以作綵內一次役兵并借年例上河客軍為宮室以

備齋宿可暮年而就此暫勞永逸之利也不報

朱本削去新本

謂不從內臣所請可見聖政復存之此固當存也

詔程昉於沿河採車材三

千兩下軍器監定樣製造戰車上修嚴武備既采唐李靖三人隊法欲試行之且以北邊地平可用車為營衛

因內出手詔令三府講求而有是詔

明年二月十二日上言論民車八月

二十三日沈括云云可考兵志云六年五月詔諸路經略司結隊並依李靖法三人為一小隊九人為一中隊賞罰俟成序日取裁其隊伍及器甲之數依涇原路牙教法按今日錄附此事於五月八日庚戌

戊子命檢正中書戶房公事張諤訊決三司開封府見

禁罪人 同判都水監李立之言雍邱縣界噎凌沫岸

漫流併入白溝河及檢視水口以東汴身填淤高水面

四尺已計功修塞詔賜塞決口兵緡錢築孔固斗門堰

役兵準此

明年二月六日王庠等勒停

辛卯詔流內銓前湖州觀察推官邵光與循一資注家便官以兩浙轉運司言光根括溫台等九縣沙塗田千一百餘頃故也淮南東路轉運司言體量前江淮發

運副使度支郎中皮公弼開真州黃池河除元定差僱夫外有三縣各曾貼夫并死損逃亡兵夫等仍曾委責降及別路官勾幹差破人船供給及以礬鹽等錢為公用得替乘船五隻送還入京又借發運司紙庫錢三百緡候得職田錢償之而權發運萬頤判押給借已還十

七千餘未償詔皮公弼令永興軍路提點刑獄司萬頤
令淮南東路轉運司劾罪以聞後公弼坐降一官頤聽
德音釋之 軍器監乞差左藏庫副使藍惟永等點檢
軍器編定御覽目錄從之 熊本言瀘州納溪寨烏蠻
出入道路乞增戍兵及徙置路分都監從之

壬辰權發遣京東路轉運判官太子中允館閣校勘呂
升卿徙淮南東路軍器監言弓匠李文應箭匠王成伎
皆精巧詔補三司守闕軍將以教工匠帶御器械鄭德

誠乞權差官輪宿直詔令真定府路總管向寶宿直舊制外任帶御器械過闕朝見不宿衛時寶過京師特命之上與王安石言向寶善戰好將也與薛仁貴何異王安石曰恐不同上曰仁貴更有機略如寶已難得安石曰向寶但能使馬精熟而已其於西市一帶山川最其所諳熟然西市之戰幾敗事如此將率要不難得安石以為寶既貪恣又西市之戰狼狽徒以西府賴其沮壞王韶故稱譽於上前爾

癸巳詔京外城二十門監門自今更不管認課利但隨

開要以透漏捕獲出入商稅錢數立為賞罰凡五等從

都商稅院請也

鄭俠事當考明年二月二十七日張謬減定稅額可考

詔梓夔

路察訪司準備差遣蒲宗閔新知永嘉縣沈達同成都

府路轉運司相度成都府置市易務利害以聞

蒲宗閔沈達此

段日錄在七年二月二十三日遣李杞時朱本先附於此今從之馮京云云仍見本月日

又詔借

大名府提點刑獄司封樁茶稅錢八萬七千緡付河北

東路都轉運司糴邊儲夏國主秉常進馬贖大藏經詔

特賜之而還其馬

乙未岷州都首領轄烏察洮州都首領巴珍覺並為崇儀副使董古為禮賓副使並蕃部鈐轄轄烏察岷州巴珍覺洮州董古河州古等皆摩正弟也王韶招之內附至是引見于延和殿而有是命既又詔董古遷一資亦為崇儀副使董古雖非首領以在納克壘城與其母郢城簡先其兄詣景思立前鋒乞降故也河北西路轉運提點刑獄提舉司言參定真定府路義勇保甲新法舊管

疆壯人皆係鄉兵及緣邊州軍弓箭社亦籍姓名巡防

把截乞並行廢罷依義勇保甲編排從之


明年正月十九日可考兵

志云罷河北西路疆壯緣邊弓箭社常係籍番上
巡守者即此事蘇軾奏議乞復置弓箭社合參考

丙申詔市易司市例錢除量留支用外並送抵當所出
以給吏祿隸都提舉市易司仍令舉勾當公事官二員
專檢估

是月廢金州平利洺州臨洺順安軍高陽大名府大名
洹水經城縣並為鎮渭州置制勝關及安化縣以舊縣

為鎮 遼主遣益州觀察留後耶律洞崇祿少卿竇景
庸其母遣左千牛衛上將軍耶律榮太常少卿乾文閣
待制梁授來賀正旦賀正旦使副四人實錄失
不記今以國信名銜補書
是歲宗室子賜名授官者五十九人斷大辟二千九百
五十一人



續資治通鑑長編卷二百四十八